

16
DE
SEXV PLANTARVM

GRATIOSI
MEDICORVM ORDINIS CONSENSV

DISSERENT
PRAESES
CHRISTIANVS GOTTLIEB
LVDWIG

BRIGA-SILESIVS
PHIL. ET MED. DOCT.

ET

RESPONDENS
CHRISTOPHORVS FRIDERICVS HAASE
LIPSIENSIS

PHIL. ET MED. CVLTOR.

HONORATVS FABRI

de Plantis Lib. II. Prop. LXXII. pag. 49.

*Generatio plantarum et animalium in omnibus quoad substantiam
conueniunt, imo ausim dicere, generationem animalium explicari
optime posse per analogiam quam habet cum generatione plantarum.*

LIPSIAE D. I. NOVEMBR. A. O. R. MDCCXXXVII.

EX OFFICINA LANGENHEMIANA.

V I R O

**MAXIME REVERENDO AMPLISSIMO
DOCTISSIMO**

D O M I N O

SALOMON HAASE

**ECCLESIAE LVTZENSIS PASTORI
MERITISSIMO VIGILANTISSIMO**

VT ET

**REVERENDI MINISTERII
PRAEFECTVRAE LVTZENSIS
SENIORI GRAVISSIMO**

PATRONO ET PATRVO

**SVMMO HONORIS ET AMORIS STUDIO
AD VRNAM VSQVE PROSEQVENDO**

HOC
DILIGENTIAE ACADEMICAЕ SPECIMEN
PRO TOT TANTISQVE BENEFICIIS
PATERNO AFFECTV PRAESTITIS
AETERNAE OBSERVANTIAE DOCUMENTVM
CVM
OMNIMODAE FELICITATIS VOTO
PIA MENTE
D. D. D.

CHRISTOPHORVS FRIDERICVS HAASE.



DE SEXV PLANTARVM.

§. I.



abscondita rerum naturalium origo, abditae *Prooemium.*
 corporum causae, effectus inopinati, mu-
 tationes inconsuetae, ingenia perspicacis-
 simorum naturae inquisitorum exercent,
 et difficultates non vulgares in indaganda
 veritate pariunt. Voluptas, quam ex in-
 petrata scientia percipimus, non parum
 minuitur, si defectum cognitionis in aliis veritatibus senti-
 mus. Attamen feruor disquirentis non infringitur: et licet
 non raro rerum naturalium examen taediosum sit; tamen spes,
 in occulta rerum principia penetrandi, animum addit et ex-
 optatum laborum fructum promittit. Negotium generatio-
 nis in triplici naturae regno omnem ferme physicorum in-
 dustriam eludit. His, licet mutationes corporum attento
 animo obseruent, structuram viscerum euidentiore reddant
 et fabricam minutissimarum partium oculo armato perqui-
 rant; nondum tamen generationis modum indagare datum
 fuit. Quotidiana scientiarum incrementa non vulgarem spem
 faciunt,

faciunt, fore vt et in his aliquando certiora detegantur. Quis seculo praeterito conuenientiam generationis animalis et vegetabilis credidisset, cum et hodierna die tantos habeat contradicentes; illam vero non leuioris momenti argumenta, ex structura partium desumpta, euincunt. Nos, de SEXV PLANTARVM dicturi, ad analogiam structurae partium animalium et vegetabilium prouocamus. Non imaginariam similitudinem fingimus; sed usus ex fabrica, situ et connexione partium deducimus, effectuumque conueuientiam sedulo perpendimus: modum vero generationis, quem Deus caliginosa nocte premit, non tangimus.

§. II.

Animal et vegetabile definitur.

Cum ea, quae olim tantum de animalibus dicta fuerunt, de vegetabilibus quoque praedicemus; vtriusque definitionem praemittere consultum duximus. Animal est corpus organicum, ex fluidis atque solidis compositum, motu et sensu euidenti gaudens, quod alimenta adsumpta in vasis determinatis vehit, eaque, pro extensione partium successiua et similis procreatione praeparat. Vegetabile siue planta est corpus organicum, ex fluidis atque solidis compositum, motu et sensu euidenti destitutum, quod succos, ex corporibus contiguus haustos, in vasis determinatis vehit eosque pro formatione successiua et similis procreatione praeparat. Fossilium ideam declarare et certis distinctionibus confirmare, praesentis instituti ratio non requirit. Ad hodiernum vsque diem tantis obscuritatibus inuoluta est origo minerarum et metallorum, vt nos, pauca determinare, plura vero sperare, possimus. Omittimus etiam ea, quae de anima, corpus dirigente, dici possent. Prorsus obscura et dissensionibus philosophorum obnoxia sunt; ita vt, quaedam tractationi nostrae immiscere, non audeamus. Licentiam illam non sine iure postulamus; cum de iis tantum, quae per corpus sunt possibile, solliciti simus. Nostrum igitur erit, ea, quae in definitionibus adduximus

ximus breuissimis dilucidare, et conuenientiam atque differentiam corporis animalis et vegetabilis vltcrius perquirere.

§. III.

Animalia et vegetabilia ratione modi compositionis egregie conueniunt. Sunt corpora ex innumera vasculorum serie composita, in quibus liquores, ex aliis corporibus hauriti, mouentur: sunt omnimode determinata et limites extensionis, pro figura partium, certas obtinent: fluidorum motus extensioni partium inseruit, cum particulae praeparatae, et in succis fluctuantes, hinc inde addantur et molem corporis augeant: in vtroque etiam corpore liquores specialiores, in varios vsus impendendi secernuntur. In animali particulae alimentosae per os hauriuntur, comminuuntur, varioque modo praeparantur, per oesophagum et ventriculum demittuntur, digeruntur ibidem et ad intestina motu peristaltico protruduntur, pars subtilissima separatur, reliqua crassior et excrementitia per viam ordinariam expellitur: sanguis, in vasis propulsus, per varia colatoria liquores specialiores dimittit. Vegetabile, vel in radice tantum, vel etiam in omni superficie, succos haurit, in parenchymate sub cuticula sito praeparat, minus conuenientes per transpirationem eiicit, elaboratiores vltcrius vehit, vt, pro varietate organorum quae transeunt, aliam indolem adsumant. Colores, sapores et odores, in variis plantae partibus diuersi, id luculenter demonstrant.

*Conuenientia
A. et V. ratione
nutritionis
organorum.*

§. IV.

Animalia et vegetabilia procreationem similis intendunt; demonstrat hoc, in illis foetus, in his semen. Inferius quidem haec dilucidius explicanda erunt; in genere tamen et hic iam exprimi possunt. In animali per testes et alia organa liquor, qui spermatis masculini nomine venit, secernitur. Adplicatur materia secreta parti cuidam alius animalis, quae ouulum dicitur: et licet pro varietate animalium, diuer-

*Conuenientia
A. et V. ratione
generationis
organorum.*

diuersissima organorum structura sit; tamen hisce peractis, foetum, aut in vtero materno nutritum, aut alio modo ex ouulo productum, expectamus. Omnis planta producit flores: in his etiam, florendi tempore, materia subtilissima, per varia organa secreta, dispergitur. Emortuis et delapsis illis partibus fructus superest; in quo, vel simplici, vel multiplici modo, semen, plantam priori similem producens, latet. In utroque igitur corpore, per mutationem quorundam organorum, aliquid producitur, quod corpori producenti in omnibus simile euadit.

§. V.

*Differentia A.
et V. ratione
sensus et mo-
tus.*

Cum vero tantam conuenientiam inuenerimus: porro nunc, quomodo differant, inquirendum est. Sensus et motus animalia a vegetabilibus potissimum distinguunt: limitatione vero in determinando opus est; ita ut in animalibus euidentiores, in vegetabilibus vero vel nulli, vel minus euidentes, inueniantur. In minutissimis insectis et sensus et motus organa detegimus. In animalibus quibusdam marinis e. g. Vrticis et Pulmonibus, a) quae prorsus mucaginosae structurae sunt, illa quidem ad sensum demonstrare non valemus; haec tamen animalia, spiculo acuto leuiter saltem irritata, sensum et motum fibrillatione produnt. In vegetabilibus organa motus et sensus frustra quaeruntur: interim solis aestus, vel frigus nocturnum, sensibiles et plane contrarios effectus in plantis producunt; ita ut flores quidam noctu aperiantur, quidam claudantur. Sunt et alii motus, qui omnino tensionem fibrarum praesupponunt. In primis vero ad herbam sensitiuam b) attenti, euidentiore et eandem fere

vt

a) Confer. HENRICI RVYSCHII Historia animalium. Tom. II. Part. IV. de exsanguibus aquaticis Lib. IV. de Zoophytis siue Plant-animalibus. Edit. Amstel. 1718. fol.

b) Est *Mimosa* Tournef. et Boerh. *Aeschynomene* aliorum. Confer.

vt in animalibus marinis declarauimus, sensus et motus praesentiam animaduertimus a).

§. VI.

Ad motum progressuum primario respiciendum est. *Differentia A. et V. ratione motus progressiui.* Animal e loco in locum mouetur, planta vero parti cuidam adfixa manet. Dantur quidem animalia marina b), quae scopulis exactissime adhaerent; ita vt sine corporis dilaceratione separari nequeant. Interim dubium adhuc est, an non proprio instinctu interdum secedant c). Quod si vero hoc non fieret, lusus naturae, in hisce confiniis animalis et vegetabilis regni, potius mirari, quam legem vniuersalitati contrariam exinde stabilire, possemus.

§. VII.

Motus fluidorum etiam in hisce corporibus, et quidem *Differentia A. et V. ratione motus fluidorum.* ratione principii et directionis, differt. In animalibus centrum motus est in corde, ex quo, tanquam ex fonte, sanguis per arterias in totum corpus distribuitur, et iterum per venas

IACOBVS BREYNIVS in plantarum exoticarum Centuria I. a pag. 31. ad 55. Edit. Gedan. 1678. fol. Inprimis species *siliculis echinatis articulatis*. Breyn. Cent. I. Tab. XVIII. Commel. Hort. Amst. Part. I. p. 29. et alia *latifolia siliquis radiatis*. Breyn. l. c. Tab. XVI. Commel. l. c. fig. 28. mouentur et sentiunt, reliquae non adeo sensibiles inueniuntur.

- a) Plura de his habet CASPAR BOSE in diss. de motu plantarum sensus aemulo. Lips. 1728. 4to.
- b) Confer. RVYSCHII Hist. Animal. l. c. Cap. I. de Vrticis.
- c) Cel. REAUMVR varia huc pertinentia profert, in Hist. Acad. Reg. Scient. Mem. 1730. p. 608. seqq. ARISTOTELIS sententiam reuellit, et hisce animalibus motum maxime lentum adscribit, ita vt per horae spatium vix pollicem vnum vel alterum absoluant. Porro etiam Mem. 1711. p. 146. et 147. de materia viscida, ex qua haec animalia composita sunt, sermonem instituit, dicitque illa glutine quodam adfixa esse vti patellas.

nas ad eundem fontem reducitur. Liquores corporis specialiores, tum ratione separationis, tum ratione motus progressiui, ab hoc circulo dependent. In vegetabilibus vero centrum motus non adest, sed succi a radice ad summitatem tantum adscendunt. Licet enim nondum adhuc explicare possimus, quomodo ille motus fiat; tamen, aeri potissimum adscribendum esse, experimenta docent a). Animalia ergo habent liquorem circulantem, vegetabilia simpliciter permeantem; in his enim arteriosis vasis nullae respondent venae. Priora circulo, posteriora transpiratione humorum viuunt, et eo ipso liquores specialiores seponunt.

§. VIII.

Obiectio solui-
tur.

Sunt quidem multi, qui circulum humorum statuunt, qualem in animalibus deprehendimus et constanter adfirmant: succos ex radice ad summitatem vehi et a summitate iterum ad radicem reuehi b). Sed sine motore, cordi simili, negotium circulationis explicari non posse patet. HALESIUS quoque contrariam sententiam experimentis et obseruationibus satis declarauit; ita vt ipse concludat: *Upon the whole, i think we haue from these experiments and obseruations, sufficient ground to belieue that there is no circulation of the sap in vegetables; notwithstanding many ingenious persons haue been induced to think there was, from seueral curious obseruations and experiments, which evidently* proue,

a) Probant hoc varia experimenta HALESI inprimis X. et XI. vbi ostenditur arborum materiam perspirabilem magis calore ambiente quam vi succi adscendentis vrgeri: vid. p. 40 et 42. *Vegetable Staticks or an Account of some Statical Experiments on the Sap in Vegetables.* by STEPH. HALES. London. 1727. 8 mai.

a) vid. Cel. WOLFFII *Vernünfftige Gedanken von den Wirkungen der Natur* §. 401. p. 644. et auctores ibidem citati.

proue, that the sap does in some measure recede from the top towards the lower parts of plants, whence they were with good probability of reason induced to think that the sap circulated a). Licet vero vniuersalis circulus in plantis non adsit; particularem tamen, succorum specialiorum praeparatio demonstrat. De his vero in praesenti prolixius agere, instituti ratio non permittit.

§. IX.

Sed et vltcrius animalia et vegetabilia ratione extensionis partium differunt. Animal in embryo quoad omnes partes iam est delineatum, ita vt tantum fibrae, adcedente succo nutritio, extendantur, fortassis etiam nouae quaedam formantur. Licet enim MALPIGHIVS, in tractatu suo de ouo incubato b), mutationes successiuas embryonis indicet; tamen subtilitas partium in principio cognitionem impedire videtur. Mutationes enim embryonis in vtero materno et incrementa corporum iam iam natorum alia demonstrant. Et si enim partium omnium delineatio in primo mense obscura adhuc sit; tamen in abortu bimestri eandem iam declaramus et in trimestri egregie cognoscimus c). Longe vero aliter res se habet in vegetabilibus. Plantula seminalis non nisi fibras plantae essentiales ostendit, quae, adcedente succo nutritio, non tam vti in animalibus extenduntur, verum et nouas partes haecenus non visas emittunt; vt vegetationis mutationes inspicienti facile patebit. Ortus ramorum et foliorum inprimis in plantis arboreis et fruticosis asserta egregie

*Differentia A.
et V. ratione
extensionis
partium.*

a) l. c. Cap. IV. p. 147.

b) Adpendicis loco ad Anatomien plantarum adnexus Lond. 1675. fol. et in operibus Tom. II. p. 75. Lugd. Bat. 1687. 4to.

c) vid. FRID. RVYSCHIVS in Thes. Anat. VI. a p. 30. ad 41. et KERKRINGIVS in Osteog. Foet. Amst. 1670. 4. inprimis p. 261. vbi foetus bimestris sceleton repraesentat.

gie probat, in his enim corpus per multorum annorum feriem conseruatur et omni anno nouae partes emittuntur,

§. X.

*Differunt A.
et V. ratione
organorum ge-
nerationis.*

Simili prorsus modo partes, quae foetum vel ouulum vel semen producant comparatae sunt. In animali semper adsunt, in vegetabili vero prorumpunt quando generatio suscipienda est, et ea absoluta iterum pereunt. Licet enim animalium partes, ad generationem necessariae, non omni tempore in eodem statu maneant, sed, et ratione aetatis, et vsus, sese vario modo mutant; tamen semper et in fene et in embryone adsunt. In vegetabili vero omni anno noua partium series producitur, quae praesentia sua fertilitatem promittit et eandem in fructibus certo demonstrat; nisi opus iam inceptum variis adcidentibus interrumpatur.

§. XI.

Obiectio tollitur.

Possset quis obiicere: quod etiam in vegetabili delineatio omnium partium praesupponatur, licet ea tecta sit et euolutione vltiori indigeat. Sed si etiam ponamus in planta, per viginti annos durante et semper ramos et flores producente, tantam seriem partium delineatam esse quantam vix vnquam imaginare possemus; tamen eo ipso non declaramus, quomodo e.g. *Salix* omni triennio truncata, iterum iterumque novos protrudat ramos, nisi semper in ipsa planta noua fieret partium formatio. Illae enim arbores et frutices, quae ob oeconomicos vsus frondibus orbantur, quo magis truncantur eo melius ramos protrudunt. Etsi quoque talem euolutionem concederemus; tamen ab incremento animalium toto coelo differret. Firma itaque manet differentia nostra specifica, quam in definitionibus superioribus posuimus; quod nimirum in vegetabili productio nouarum partium, in animali vero incrementum iam delineatarum fiat.

§. XII.

§. XII.

Hisce praemissis ad ipsam tractationem adcedimus. *Sexus definitur.* Sexus est diuersitas partium corporis naturalis, quarum concursu negotium generationis absoluitur. Hanc definitionem ad animal adplicari posse quilibet perspicit. Vasa spermatica, testes, vesiculae feminales, penis, vagina, vterus, tubae, ouaria, sunt organa ad generationis negotium necessaria et sobolem promittentia, si modo certa relatio inter ea intercedat. Si vero pars deficit, vel morbosa deprehenditur, tunc illi effectus concatenati frustra expectantur. Si etiam concursus seu mutua relatio, quocunque modo etiam ea fiat, prohibetur; tunc similis progeneratio deficit. Licet vero ut plurimum duo animalia sint, in quibus coniunctis illa organa animaduertuntur, tamen non dicere potuimus: *corporum naturalium*; alias enim non licitum fuisset, aut animale, aut vegetabile hermaphroditum statuere. Nunc potius adiungimus: organa haec, vel in vno, vel duobus animalibus, aut vegetabilibus, deprehendi. De his vero infra prolixius acturi sumus.

§. XIII.

Ad duo igitur in sexu determinando potissimum respiciendum est: I. ad praeparationem materiae, cuius praesentia foecunditatem adfert, cuius absentia eandem tollit; *Essentialia sexus determinantur.* II. ad organon, quod vel foetum futurum iam continet, vel quod eundem, aliunde receptum, tantum ad iustum exclusionis tempus fouet et cum quo aliud organon, materiam foecundantem adcipiens et dimittens, arctissime connexum est. In hac igitur tractatoine ad analogiam organorum respicimus; quae magis, effectuum aequalitatem, quam figurae similitudinem, praesupponit. Inter viuipara et ouipara animalia, ratione generationis organorum, maxima intercedit diuersitas. Imo ipsa ouipara non eandem partium structuram obtinent.

Interim organa diuerfa, dummodo in essentialibus conueniant, eundem producere effectum, patet.

§. XIV.

Sententia veterum de sexu

Sed cum veteres botanici iam multa de planta mare et foemina dixerint; respiciendum est: an in his analogiam inter animalia et vegetabilia quaesierint? an vero tantum, ex similitudinibus quibusdam arbitrariis, plantas determinauerint? Respondeat CAESALPINVS, qui pro ratione temporis de structura plantae fatis sollicitus fuit: *Maris et foeminae distinctione non indiguerunt (plantae); quamquam, secundum aliquam similitudinem, quaedam mares adpellentur, quaedam foeminae a).* Ita *Mercurialis mas* dicta fuit quae testiculos habuit siue fructus binos rotundiores, et altera species *foemina, spicata* alias dicta, quae iisdem destituebatur, contra recentiorum sententiam de sexu b). Ex hisce colligitur: illos tantum in historica cognitione plantarum ad sexum respexisse, nunquam tamen in physicis ex doctrina de vsu partium deduxisse. Ex iis etiam, quae SENNERTVS de femine plantarum et brutorum animato profert et ex aliorum auctorum sententiis adducit c), luculenter adparet: ideam sexus, qualem nos demonstrare intendimus, veteribus plane ignotam fuisse. BLAIRIVS quidem ostendere adniti-
tur d), SENNERTVM ab illa sententia non plane remotum fuisse, et ei tantum cognitionem structurae floris defuisse; interim ex collata integra tractatione patet illum plane aliam
ideam

a) Vid. AND. CAESALPINI Aretini de Plantis Libri XVI. Florentiae 1583. 4to Lib. I. Cap. VI. p. 12.

b) Vid. Botanick Essays, by PATRICK BLAIR. Lond. 1720. 8 mai. Ess. IV. p. 235.

c) Vid. DANIELIS SENNERTI Opera. Tom. I. Hypomn. Phys. IV. Cap. VI. VII. et VIII. p. 128. seqq. Edit. Lugd. 1666. fol.

d) l. c. p. 226. seqq.

ideam habuisse a). HONORATVS FABRI, licet neget differentiam sexuum requiri ad generationem plantarum, et eandem in *Palma* fabulosam pronuntiet; tamen de floribus, quos hermaphroditos nos adpellamus, egregie et prorsus ex nostra sententia loquitur: *Planta in ipso fructu a se producto seminat, hoc est, semen effundit. Igitur alieno non indiget utero, nam simul cum semine vuluam tornat. Fructus autem seminis vulua est. Quod sane quibusdam nouum forte videbitur; si tamen res attente consideratur, non videtur modus faciliior etc.* b) Recentiores vero botanicos, qui in sexu plantarum aliquid praestiterunt BLAIRIVS prolixius recenset c).

§. XV.

Dantur quidem casus, vbi ob defectum nutritionis, vel *Floris necessitas ostenditur.* ob luxuriantes plantae partes, vel aliam ob causam, florem non sequitur fructus; nunquam vero fructus sine praevio flore deprehenditur. Cum igitur fructus, et in eo semen, illud

- a) Vrgemus tantum ea quae BLAIRIVS l. c. p. 226 et 227 habet, vbi obiectionem, *quod semen in se ipsum agere non possit* SENNERTO tribuit; cum tamen ALPHONSVS DE CARANZA, I. C. Hispanus in Tr. de part. nat. et legit. C. I. p. 44. illam formaue-rit et responsio, qua obiectio soluitur, SENNERTO ipsi displiceat. Dicit enim: *ad soluendum hoc argumentum communiter solet responderi, in semine esse diuersas substantias etc.* et paulo post: *Verum solutio non valet, et in rei veritate non est nisi mera euasio, inuenta ad argumenti elusionem, quia non est verum talem virtutem in spiritu seminis residere, etc.* Confer. SENNERTVS Lib. cit. p. 134. col. 2.
- b) In tractatu de plantis et generatione animalium. Lib. II. Prop. 92. p. 54. Norimb. 1677. 4to
- c) l. c. p. 268 ad 277. vbi NEHEM. GREW, IOH. RAIVS, RVDOLPHVS IAC. CAMERARIVS, SAM. MORLANDVS, GEOFFROI, RICHARDVS BRADLEY, SEB. VAILLANTIUS, et scripta huc pertinentia citantur.

illud sit quod simile producit, vno verbo generationis finis a); sequitur, quod in flore generationis negotium sit quaerendum et per eius structuram explicandum. Reiicimus eo ipso sententiam quorundam veterum aeque ac recentiorum, qui ornamenti tantum causa flores factos esse autumant. Idea poetae magis quam philosopho conueniens! Nec cum illis facimus, qui florum partes teneriores et interiores excrementorum separationi vel insectorum victui destinatas esse putant.

§. XVI.

Floris definitio difficilis.

Sed quae difficultates sese nobis offerunt, dum definitionem floris exhibere necesse habeamus? Quatenus conuenientia inter flores *Rosae* et *Tritici*, *Lilii* et *Coryli*? tamen diuersa haec sub vno conceptu coniungere, leges definitionis exigunt. Notas, quas ex partibus floris pro concinnanda definitione sumere possemus, in medio relinquere cogimur, cum nullam adhuc earum habeamus ideam. Quam imperfectae sint variae definitiones, scripta botanicarum euoluenti patebit b). Nemo igitur nobis vitio vertet, si et nos, ante structuram inuestigatam, imperfectam concinnamus. Liceat ad vulgi conceptum

a) Vid. SENNERTVS l. c. Cap. VII. 135. col. 2. *Dicitur reuera generari arbor vel herba, non cum planta e terra crescit, haec enim non est generatio, sed plantae, in actu imperfecto constitutae, ad actum perfectum deductio.* et Cap. VIII. p. 136. col. 1. ex SCALIGERI Exercit. 6. Sect. 10. citat. *et tum generat arbor cum producit semen.*

b) MALPIGHIVS in Anat. Plant. p. 40. Lond. 1675. fol. *Florem pleni veris et renascentis anni indicium arborumque gaudium adpellat.* TOVRNEFORTIVS in Inst. R. Herb. p. 669. Lugd. 1719 4to mai. eandem seruat. p. 67. perfectiorem exhibet: *Flos est plantae pars coloribus propriis persaepe insignis fructuique nascenti plerumque adhaerens, cui primum alimentum, ad tenerrimas eius partes explicandasministrare videtur.*

ceptum florem definire per partem membranaceam et filamentosam plantae, colorum elegantia vt plurimum a reliquis diuersam.

§. XVII.

In omni flore consideramus tres partes: 1. inuoluen-
tes, 2. masculinas, 3. foemininas. Possemus quidem hanc
distinctionem ex vegetabilis definitione et ex iis, quae de con-
uenientia vegetabilium et animalium dicta fuerunt, confir-
mare. Ne vero quis credat nos minus demonstrata sumere,
aliis nominibus nunc insignire praestat; donec explicanda de-
monstrent, terminos illos non inproprie esse adhibitos. Con-
sideremus ergo in omni flore: 1. inuolucrum, 2. stamen, 3.
pistillum. Breuitas tractationis non permittit diuersas bota-
nicorum sententias, in determinatione harum idearum per-
pendere, reiicere, stabilire. Exhibeamus definitiones, quas,
perlustratis olim auctorum sententiis, in obseruationibus
plantarum sufficientes et distinctas inuenimus et in hac tra-
ctatione, magis ad scopum nostrum quam ad methodi signa,
respiciamus.

§. XVIII.

Licet partes floris inuoluentes ad differentiam sexus, *Calicis men-*
quam nos illustrare intendimus, nihil adferant; tamen ne ali-
quid deesse videatur, de his etiam breuissimis quaedam di-
cenda sunt. Calix est membrana exterior floris, viridis vt
plurimum coloris, pedunculo vel contigua vel continua.
Si petala iam firma satis sunt, tunc prorsus deficit e. g. in *Tu-*
lipa, Lilio etc. In variis petala tantum defendit et, illis quo-
dammodo expansis, decedit, e. g. in *Papauere, Chelidonio*
etc. In plurimis vero florem tenellum integre, perfectio-
rem ex parte, cingit. In variis cum petalis secedit, in aliis per-
sistit. Tunc, vel in eodem statu manet, vel reflectitur.
Porro in hoc ultimo statu, vel semper manet, vel iterum re-
silit et fructui eundem vsum praestat quem olim flori exhi-
buit.

buit. Non deficiunt vero casus, vbi calix fructum, in sinu suo arcte conclusum, fouet, vt in *Rosa*; vbi ad mentem T O V R N E F O R T I I calix in fructum mutatur. Quae idea tamen non semper poterit adplicari, e. g. in *Narcisso* vbi calix inferior est, vaginae formam habet et exsuccus fit, ouarium vero, florem sustinens, extra vaginam illam prorumpit. Sit nobis calicis vox genericus conceptus inuolucris floris exterioris, ita vt omnia nomina specialiora et synonymica cum eo combinentur. Perianthium, spatha, gluma, squama, amentum, calyptra et alii termini in specialiori examine determinatam suam recipiunt significationem; nobis sufficiunt dicta. Mittamus etiam explicationem figurae et incisionum vltiorem, nos enim nimis a scopo abduceret.

§. XIX.

Petala declarantur.

Petala sunt membranae coloratae, partes internas florum cingentes. Iure suo ad inuolucra referuntur: ob texturam teneriorem et colorum elegantiam tamen distinguuntur; licet essentiales distinctionis notae deficiant et modo dictae in examine florum saepius negotium faceissent. Nullum alium praestant vsum, nobis hactenus euidentem, quam vt tegant partes floris interiores et teneriores, quae a calice duriori forsitan nimis premerentur. Figura petalorum tam diuersa et elegans non vltimum est argumentum, illa adhuc alios vsus praestare, ad quorum cognitionem nondum peruenimus. Inuolucra vero in vniuersum considerata muniunt partes teneras, ne vel frigus illas contrahat, vel calor exsuccas reddat, vel etiam insecta adrodant. Augent etiam transpirationem, quae succorum elaborationem perficit. Fortassis et membranae illae, per structuram suam internam, minus adhuc determinandam, humoribus specialioribus secernendis inferuiunt. Probationem huius positionis, diligentior disquisitione nectarii promittit, cuius Cel. LINNAEVS crebram mentionem

tionem iniicit a). Etsi enim variae partes, quas nectaria appellat, aut ad stamina, aut ad petala adhuc referri possint; in aliis tamen certocertius est, conseruari liquores fructificationi plantae inferuientes b).

§. XX.

Stamen est filamentum, antheram sustinens, inter floris inuolucra situm. Filamentum ratione florum variat, longum, breue, crassum, tenue, et sic porro deprehenditur. Ratione situs ex variis partibus deducitur. Quando cum calice cohaeret, tunc vel ipsius margini, vel fundo inferitur. Cum petalis ipsis non raro connectitur, inprimis in monopetalis floribus; saepius tamen ex placenta, seu ex corpore crasso fructum sustentante, producitur et stylo interdum adhaeret, e. g. in *Orchidibus* et congeneribus. Textura cum petalis conuenit. In inferiori loco, ubi adhaeret, ut plurimum basin ampliorem obtinet; in superiori vero parte, antheram adnexam habet, ubi principio cuspidato, vel margini, vel medio eiusdem, inplantatur. Anthera non raro stamini contigua fit, ut versatilis deprehendatur: cohaesionem vero arctiorem fuisse nutrimenti necessitas demonstrat.

§. XXI.

Anthera c) est corpusculum variae figurae, primo spongiosum, postmodum puluerulentum adparens, structurae lamellatae. Lamellarum fibrae primo arctissime cum filamentum cohaerent, postmodum vero quasi emoriuntur. Ut

Speciatim anthera describitur.

C 2

pluri-

a) CAROLI LINNAEI genera plantarum. Lugd. Bat. 1737. 8 mai.

b) Conf. BLAIRIUS l. c. p. 255.

c) Apex etiam dicitur, sed termino minus conueniente, quia apex omnem summitatem significat et ideo cum stigmate, inferius declarando, confundi posset. Nonnulli etiam testes adpellant antheras; sed non solum testium, sed et vesicularum seminalium officium habent.

plurimum ex duabus lamellis constant, quae, introrsum volutae, intra villos tenuissimos puluerulentam materiam fecerunt. Haec tandem lamellis sese extrorsum euoluentibus, hinc inde dispergitur. Eiectio pulueris, ut plurimum flore iam aperto, non raro tamen eodem adhuc clauso, fieri solet. Si etiam alia esset figura antherarum; tamen ad lamellam membranaceam, villos et puluerem subtilissimum, tanquam ad illarum partes essentielles, respicimus: e.g. in multis floribus compositis filamenta quinque, flosculo monopetalo adnata, cylindraceam lamellam sustinent, quae in cauo suo puluerem subtilissimum continet, quem stylo, per cylindrum extenso, communicat. Ita etiam aliae antherae ex vnica lamella constare possent, si stylo a latere adplicatae essent.

§. XXII.

*Filamenti
usus ostendi-
tur.*

Filamenta succum perfectiorem recipiunt et ad antheras deducunt. Ostendit hoc: 1) arcta cohaesio antherarum ante pulueris dimissionem, laxior quo magis ad emissionem pulueris adcedit; 2) connexio filamentorum cum partibus, quae sufficientem copiam succi purioris praebere possunt; sunt enim, calix, petala, stylus et placenta fructum sustentans; 3) figura inferius crassior, superius tenuior, quo ipso succi quasi in angustius spatium rediguntur. Dantur quidem casus ubi filamenta prorsus deficere videntur; ad minimum tamen subtilissima spicula adsunt antheram recipientia, quae in plantis epiphyllispermis microscopio deteguntur. In *Aristolochia* nulla adsunt filamenta, sed antherae quasi coalitae, intra diuisiones stigmatis adnatae, deprehenduntur. In aliis filamenta coalita sunt et f. p. Sed si etiam haec in quibusdam plantis deficerent; tamen mechanismum non destrueret, quia antherae rarius etiam aliis partibus adhaerere possent, e.g. petalis a).

§. XXIII.

a) *Chamaerops* Plinii et Linnaei, *Chamaeriphes* Dodonaei et Ponderae,

§. XXIII.

Antherae succos per filamenta adlatos vltcrius prae-
 parant, et ita materiam humidiorcm quasi vinctuosam sepo-
 nunt, quae postmodum puluerulenta euadit. Demonstrat
 hoc lamellarum structura: vasa enim in illis, pro secretionc
 formanda, vario modo dispescuntur. Fibrosae siue villosae
 partes in interiori superficie antherarum sitae, si anthera-
 rum lamella cylindrum format, vel antherae in formam cy-
 lindri dispositae sunt; puluerem secretum cum styli villis
 communicant, vt in omnibus floribus compositis et quibus-
 dam aliis obseruamus. Si vero stylus ab antheris remotus
 est; tunc resiliunt illae, quo puluerem, ad summitatem styli
 amandandum, vi excutere possint. Et in hoc casu, momen-
 taneum esse foecundationis negotium, non sine iure arbi-
 tramur. Puluis antherarum vtplurimum luteus deprehen-
 ditur; in quibusdam tamen colore variat. Et figura pulue-
 ris maxime diuersa est a): sed cum cognitio illa subtilior
 sit, vt nullum adhuc vsum exinde sperare possimus; lubenter
 eandem relinquimus, donec tempora certiora detegant.

§. XXIV.

Pistillum constat ex ouario et stylo et est pars in cen-
 tro floris erecta variae figurae. Calix in centro suo, vel
 etiam si deest, pedunculus corpus crassum plus minusque

C 3

con-

derae, planta ab aliis ad Palmas translata, antheras in petalorum
 summitatibus sitas habere nobis visa est. LINNAEVS tum in
 Musa cliffortiana p. 10, tum in Generibus Plantarum gen. 888
 filamenta propria describit. Sed cum sint membranae latiores
 florem nondum apertum cingentes et antherae tum temporis
 introrsum flexae deprehendantur, petala primo florem cin-
 gentia, postmodum antheras sustentantia, adpellarem.

- a) Varia de colore et figura pulueris antherarum habet GEOFFROI
 Mem. Ac. Reg. scient. 1711. p. 277-281. et VERDRIESIVS in
 Act. Erud. Lips. An. 1724. Mens. Sept. p. 409.

conspicuum et carnosum format, quod nonnulli placentam alii receptaculum fructus adpellant: huic ouarium vel delineatio futuri fructus a) insistit, vel etiam, arcte cum illa cohaeret. Placenta saepe tam tenera est, vt vix ab ipso calice distinguatur; non raro tamen columnulam, vel corpus quadrangulum, vel alius figurae maxime conspicuum, repraesentat. Si vnicum tantum semen sequitur, vel si bina vel quatuor placentae adhaerent; tunc multi, loco ouarii, voce embryonis vtuntur b): ouulum vero lubentius dicendum esset; quo conuenientiam quandam cum ouario retineret. Sed et saepissime fructus futurus infra florem est et calici quasi innascitur: in quo casu ouarium partem styli non facile dixerim. Ne vero anomalia oriatur, haec expressio et nobis sit licita. De consideratione specialiori ouarii nihil nunc moneamus; cum illud pro differentia fructuum variet et ideo tractatio nimis prolixa foret.

§. XXV.

Styli structura.

Stylus est corpus variae formae, saepius filamento simile, quod, vel centro ouarii insistit, vel intra ouula sese dimittit et placentae, cui ouula inhaerent, inplantatur. Diuisiones inferiores penetrant vsque ad quodlibet semen, vti in omnibus tetraspermis adparet, vbi styli diuisiones eo loco cohaerent, quo semen, maturum factum, separatur. Stylus vel simplex est, vel multiplex. Prior saepius in progressu in varias partes diuiditur,

- a) Ovarium LINNAEVS adpellat germen: quam vocem alii significatui reseruare malleamus, quem iam olim et in vulgus obtinuit; vbi prurptionem nouae plantae, vel ex semine, vel ex radice, vel ex gemma, denotat. Vteri vero vocabulum, quod aliis adridet, non tam proprium credimus. Semen cum ouo, ergo series feminum cum ouario, comparatur.
- b) e.g. TOURNEFORTIVS dicit: *pistillum stipatur quatuor embryonibus*. Embryonis vero vox synonymon potius sit plantulae feminalis.

ditur, quas tubas styli adpellare solent. Stigma est summitas styli, quae figurae diuersae et non raro diuisa atque cuspidata deprehenditur. Substantia quoque variat; est enim vel cirrhosa, vel verrucosa, vel spongiosa, vel caua humore mucido plena. Styli cauitas in pluribus euident, in aliis ex analogia euincitur.

§. XXVI.

Delineationem ouarii in omnibus adesse disquisitio florum nondum adhuc apertorum docet. Vltorius vero, et embryo plantae futurae, in radice delitescens, idem ostendit. Si bulbum *Tulipae*, qui, in terram demissus, florem certo promittit, examinamus; tunc in centro eius florem integrum exacte delineatum deprehendimus, ita vt non solum petala, sed et stamina, imo ipsum fructum trilocularem cum seminibus sibi inuicem superinpositis ostendat. Seminis delineationem, saepius adcuratori examini subiecimus; sed nunquam certiores fieri potuimus, an in semine sic delineato ante florendi tempus plantula seminalis adsit. Hoc inposterum alia via tentandum erit, quo ad illud phaenomenon perueniamus, quod in omni generationis negotio lucem adfundere poterit: in animalibus enim vix talia expectare licet. Maximi vero momenti est illa delineatio. Nisi enim certa directio canalium particulas quasdam, in fluido motas, in ordinem, figurae plantarum conuenientem, disponderet; non explicari posset, quomodo foetus, omnimode determinatus, oriatur. Medullam, ex centrali pedunculi parte adscendentem, illud perficere, non pauca argumenta suadent: interim ad plenariam veritatis euictionem varia adhuc requiruntur experimenta.

§. XXVII.

Stylus puluerem in antheris secretum vel tantum eiusdem partem subtilissimam, recipere et ad fructum deducere potest. Demonstrat hoc summitas eius, in quam plurimis plantis

plantis intra ipsas antheras sita ; in aliis vero, vbi altior est, tum non raro se dimitit et stigmata pulueri quasi inmergit, vt in *maluaceis floribus* obseruare licuit. Si vero stylus semper supra stamina erectus deprehenditur ; tum, vel uehementia excussionis siue reuolutionis antherae, vel situs floris demissus, idem praestare valet. Volatilitas materiae spermaticae etiam adleganda est. Stigmata, quarum figuram et conditiones superius descripsimus, receptionem pulueris demonstrant ; pura enim sunt ante adceptionem pulueris, maxime conspurcata post eius dissipationem a). Cavitates in quam plurimis conspicuae idem ostendit et conclusionem ad alias partes, quarum disquisitio ob teneritatem difficilior est, permittit. Tandem connexio et communicatio cum ipso ouario florendi tempore detecta, vbi interiora fructus penetrat stylus et numerus diuisionum inferiorum cum numero capsularum vel seminum conueniens maximum argumentis pondus addit. Licet vero diuisiones superiores styli vel stigmatis ut plurimum cum inferioris fructus numero conueniant, vt in *maluaceis* saepius experti fuimus et in aliis facili negotio conspicitur ; non semper tamen haec valere multae demonstrant plantae stylo simplici gaudentes, quae tamen fructum multiplicem obtinent, vbi diuisiones inferiores partitioni fructuum respondent et superius coalescunt.

§. XXVIII.

*Campanulae
exemplo ha-
ctenus dicta
declarentur.*

Campanulae, inprimis illae, quae flores in spicas longas dispositos habent, vti *pyramidalis*, successiuam florum mutationem in partibus nunc descriptis vno quasi obtutu ostendunt.

a) Confer. LINNAEVS in *Flora Lapponica* p. 225. edit. Amstel. 1737.

ostendunt. Non incongruum igitur erit, vnico hoc exemplo vsum partium declarare, antequam ad positum florum in diuersis plantae partibus adcedamus. Aperiamus florem, qui petalum nondum satis coloratum et vix ex calice prorumpens habet; stylum maxime hirsutum, excepta inferiori parte, et antheras a latere adplicatas, longas, crassas, striatas, humiditas, quasi vinctuosas, obseruamus. Sumamus postea florem, qui ad aperiendum proximus est; stylum in toto suo ambitu, cui antherae adplicatae erant, crassum, puluere onustum quod ex antheris intra villos eius abiit, antheras marcidas, tenues, contractas, puluere vacuas, conspiciamus. Sectio horizontalis styli, limbum, ex globulis pellucidis compositum, pruina quasi obsitum et in medio cauitatem vnicam, liquore vinctuoso plenam, ostendit. Crassities styli medii, insignis et duplo maior, quasi inflata, deprehenditur. Post petali expansionem stylus adhuc crassius est, puluis non ad fundum floris dimittitur, sed sensim sensimque euanescit. In flore paulo inferiori, stylus puluere ferme orbus, tenuior vt in praecedentibus, summitas in tres partes diuisa, antherae in fundo floris tenerrimae, filamentorum partibus subtilissimis similes, inueniuntur. In floribus marcidis, stylus tenuis, fuscus, contractus, antherae crispatae, conspiciuntur. Omnibus marcidis, omnibus ablatis, fructus nunc peruestigandus est. Sectio prima horizontalis ouarii, vbi stylus cum illo connectitur, foramen medium vnum, altera vero et sequentes sectiones tria foramina, parietibus fructus internis proxima et liquore vinctuoso plena, ostendunt. En mutationes partium fructificationis succedaneas, quas in omnibus plantis animaduertimus, et saltem hoc exemplo declarauimus.

§. XXIX.

Cum breuitati studendum sit; non vltius rem exem- *Confectaria ex*
 D *plis praecedenti-*

bus forman-
tur.

plis declarare licet. BLAIRIVS a), VAILLANTIVS b), aliique c) auctores mutationes fructificationis passim con-
signarunt. Ex structura partium iam probabiliter patet: puluerem, in antheris secretum, non tantum stylo adplicari, sed et intrare, quia insigniter expanditur, porro et ad foecunditatem non parum conferre, cum fructus mox expandatur et crassescat. Nec negotium variat, quod stylus per poros minutissimos a latere puluerem recipiat. In aliis, vbi summitas stigmatis huic functioni destinata est; vel cirrhosa, vel villosa, vel cribrosa substantia, itidem receptioni capax est. Prouocamus etiam ad subtilitatem materiae d). Licet enim ipse puluis non penetraret; tamen eo ipso non euincitur, nihil aliud penetrare posse. Obiectiones eorum tangere non animus est, qui materiam prolificam, non per stylum, sed per fundum floris intrare, adserunt e).

§. XXX.

De vario po-
situ partium
floris agitur.

Varia est natura in operibus suis et partium modo explicatarum combinatio non vno modo absoluitur. Maxima pars florum pistillum in medio et stamina circa eundem posita monstrat, quae omnia inuolucris supra descriptis cinguntur. Dantur etiam inuolucra, quae partes hasce separatim

- a) l. c. Ess. IV. upon the Generation of Plants passim, inprimis vero p. 280. et seqq.
- b) In sermone de structura florum, qui et gallico et latino idiomate prodiit Lugd. Bat. 1728. 4. inprimis p. 8. exemplum *Parietariae* exhibet.
- c) Confer. The Gardeners Dictionary by PHILLIP MILLER. Lond. 1737. fol. sub tit. Generation. et SAMVEL MORLANDVS in Phil. Transact. Num. 287. 1703.
- d) Conf. HALESIVS l. c. p. 356. vbi coniecturam de vi attractiua sulphureae partis in antheris proponit.
- e) Conf. BLAIRIVS l. c. p. 280. et seqq.

tim ferunt, ita vt vnum stamina, alterum pistillum capiat. Flos stamina habens, secretionem, perfectionem et dissipationem pulueris, intendit; postmodum perit. Exemplo sint omnia amenta. Flos stamina ferens, ab illo, qui pistillum habet, saepius in eadem planta separatus est, ita vt prior sit inferior, alter superior, vt in *Ricino*; in aliis vero plantis inuersus ordo deprehenditur. Exemplo sit *Mays*, *Lacryma Iobi* et s. p. Dantur etiam plantae quoad structuram reliquam exacte similes, quarum tamen vna stamina, altera pistilla ostendit. Olim parcissima fuit haec familia, nunc vero sensim sensimque maiora sumit incrementa, et variae tum indigenae tum exoticae plantae, adcuratori examine facto, huc referuntur. a)

§. XXXI.

Ex hisce dictis florem nunc definimus tanquam partem *Floris definitio exactior.* plantae, organa generationis, scilicet stamina et pistilla inuolucris conuenientibus continentem. Si inuolucrum tantum stamina habet, florem marem, si pistillum tantum obtinet, foeminam, si vero et pistilla et stamina simul fert, hermaphroditum adpellamus.

§. XXXII.

Haec sunt ea, quae de sexus differentia, ex ipsa structura *Sexus notio in vegetabilibus ulterius stabilitur.* florum, dici possunt. Quaestio nunc superest: an mechanismus, quem in praecedentibus declarauimus, necessario foecunditatem feminis inuoluat? Et nexus et mutatio partium nunc declaratarum illud satis demonstrant. Porro etiam patet, sexus nomen summo iure adhiberi: quia, per successiuam mutationem harum partium et post concursum pulueris secreti cum pistillo, negotium generationis absoluitur; §. 12. dum hisce secedentibus nihil amplius fit quam expansio fructus

D 2

ctus

a) vid. LINNAEI Genera Plantarum Class. XXII. Dioecia et Class. XXIII. Polygamia.

Etus per succum nutritium adcedentem. Quaerunt vero contradicentes: an hoc ita fiat vt in animalibus? Respondemus adfirmando. In animalibus, aut semen masculinum delineationem futuri fructus in ouarium introducit, aut vi quadam spirituosa delineationem in ouario formatam expandit a). In vegetabilibus, puluis, ex parte masculina secretus, aut embryonem continet in ouulum deducendum, aut halitu subtili ouario et simul omnibus feminibus siue plantulis feminilibus (embryonibus) vim expansiuam adfert. Non vulgaris spes adfulget fore, vt in posterum generatio animalis explicetur per vegetabilem, dummodo experimenta adcuratius instituantur. Sed quot inpedimenta veritatis rite detegendae inueniuntur! Adponamus phaenomena quaedam haftenus obseruata, donec physicorum diligentia meliora et adcuratiora dabit; quae certo expectanda sunt.

§. XXXIII.

De *Palmae*
dactyliferae
fructificatione
differitur.

Licet iam varii per *Palma dactyliferam* negotium generationis explicare conati fuerint et antiquiores, etiam sexum non adserentes, in *Palma* differentiam illam concefferint b); tamen, breuissimis ea proponere, institutum nostrum requirit, praecipue cum nos, ad experientiam barbarorum qui culturam eiusdem fuscipiunt et ad autopsiam, respiciamus. In regione Dactylorum, quam Scherid vocant et quae 33 gradui longitudinis subiacet, copia thermarum culturam *Palmae dactyliferae* felicem et voto incolarum respondentem efficit.

Mense

a) Tertium adhuc vrgetur, siue commixtio vtriusque feminis: fundamento tamen destituitur probabilitatis; quia organa deficiunt, ex hac massa difformi delineatum corpus formantia.

b) Vid. PLINII SECUNDI Hist. Lib. XIII. Cap. IV. PROSPERIS ALPINI de Plantis Aegypti Liber, Venetiis 1592. 4to. p. 10. et II. Et RAIUS in Hist. Plant. Tom. II. Lib. XXIV. p. 1353. et alii.

Menſe Februario folia ſuperius explicanda coronam arboris augent et vaginae, ex commiſſuris foliorum inferiorum, cau-lem cingentium, prorumpunt. Menſe Martio flores in vaginis ſe extendunt, ita vt rumpantur. Incolis differentia, arboris florem ſtaminibus conſpicuum ferentis et arboris fructum tantum producentis, cognita eſt; poſteriores enim maxima copia colunt, priores vero tantum hinc inde conſeruant. Sumunt ramum floriferum ex arbore ſtaminibus conſpicua, et in rimam vaginae fructiferae inplantant, ſicque, vt illi lingua patria exprimunt, foemina per marem in-
praegnatur; puluis enim vento agitatur, late ſe expandit et arbores adſtantes quoque vi ſua fertiles reddit.

§. XXXIV.

Comparisonem nunc inſtituamus, inter arbores pul-
uere inpraegnatas et alias quae, puluerem nondum recepe-
runt, eodem modo, quem incolae nullis principiis phyſi-
cis inſtructi et arbores ſolitariae oſtendunt. Arbor fructifera,
cui adplicatus fuit flos ſtamina ferens, vaginam maiorem ha-
bet, eandem expandit, rumpit, illa exareſcente flores interiores
piſtilla extendunt, pulpa fit optima, dulcis, ſucculenta, nucleus
crassus qui in noſtra terra ſolo commiſſus plantulas produxit.
Arbor fructifera, cui nondum adplicatus fuit flos ſtamina fe-
rens, vaginam minorem habet, quae, ariditate magis quam pi-
ſtillorum vi, rupta, expanditur. In fructu pulpae loco adest
cortex durior, ſiccus, adſtringens, officulum vel nullum, vel
tenue, germen non promittens. Arbor, quae ſtamina fert,
floribus exſiccatis nihil producit, donec ſequenti anno pro-
rumpant noui flores iterum puluerulenti. Mutatio enim ar-
boris masculinae in foemininam nulla obſervatione haecenus
comprobari potuit.

*Mutationes in
arbore in-
pragnata et
non inprae-
gnata.*

§. XXXV.

*Terebinthi
exemplo se-
xus determi-
natur.*

De *Terebintho* idem constat a). Colitur et illa in regione Dactylorum, vbi incolae, flores, ex planta mare decerptos, in fasciculos colligunt, in vmbra paulatim exsiccant, postea-que ramis arboris, quam foeminam vocant, et quae fructifera est, adligant b). Puluis itaque hinc inde supra arborem dispellitur, quo pistilla foecunditatem recipiant et Pistaciam, nucleis succulentis foetam, proferant; quae terrae commissa plantulam propellit: si enim haec encheiresis omittitur, tunc fructus minus edules proferuntur. Dubitauimus semper: an flos, in vmbra exsiccat, vim prolificam conseruare queat? sed, cum experientia illud probet, quid contradiceremus, non habemus. Obseruationes haec barbarorum, stylo vulgari, minus botanico exposuimus; quo eo melius adserti veritas pateat, quod nullis terminis artis sed vulgari loquendi modo prolatum fuit.

§. XXXVI.

*Obseruationes
sexum planta-
rum confir-
mantes.*

Nostrium nunc esset varias obseruationes prolixius explicare et sententiam nostram testimoniis auctorum stabilire: cum vero haecenus inuenta non omni obiectione maiora sint, et nos tantum ex structura negotium generationis deducere voluerimus; breuissimi in his simus, donec vel aliena vel propria obseruatio meliora ostendat.

Duo-

a) *Pistacia peregrina fructu racemoso, siue Terebinthus indica Theophrasti* C. B. p. 401. qui vnus plantae mentionem facit. Conf. BOCCONE in Museo di Fisica et di Esperienze Obs. 44. p. 282. Edit. Venet. 1697. 4to. vbi de duabus plantis loquitur: *e perche in Sacca et in Agrigento offeruai due alberi di Pistacchi, differenti vna dall' altero, e distinti dai Paesani con titolo do maschio et femina etc.*

b) BOCCONE l. c. varios adhuc modos, quibus Siculi vtuntur, recenset.

Duodecim *Tulipae* BRADLEI, antheris ante pulueris dimissionem remotis, nullum producunt nec semen nec fructum, sed ouarium est abortiuum a).

Porri semina fertilia mixta sunt sterilibus, interim nec crassitie nec duritie differunt, sed terrae commissa cognoscuntur b).

BOBARTII *Lychnis* antheris destituta, semina producebat, sed sterilia postmodum inuenta sunt, nam plantam non propagare poterant c).

Mays cui GEOFFROI spicas staminibus onustas ante florendi tempus detruncauerat, semina non nisi pauca producit d).

Spinachia foemina, remota planta mare, semina quidem satis crassa producit, sed terrae commissa plantulas feminales non exhibent e).

Tulipae antheris priuatae per antheras *Tuliparum* proximarum inpraegnatae fuerunt e).

Cucurbitaceae plantae flore mare remoto, nullos proferunt fructus; proferunt in contrario casu e).

Mays in feminibus colore variat, si multae plantae intermixtae ponuntur, tunc spicas feminum coloribus mixtis deprehendimus e).

§. XXXVII.

a) BLAIRIVS l. c. p. 241.

b) BLAIRIVS l. c. p. 240.

c) BLAIRIVS l. c. p. 243.

d) Ac. Reg. Sc. Hist. 1711. p. 194. sed experimentum imperfectum fuit, quia pauca semina crassitiem et duritiem conuenientem habuerunt: an vero a planta propinqua puluerem receperint? an non obstante crassitie conueniente sterilia remanserint? dubium adhuc manet.

e e e e) Vid. the Gardeners Dictionary Tit. cit.

§. XXXVII.

*Obiectio de
diuersitate
organorum
tollitur.*

Obiectiones quaedam adhuc remouendae sunt. Dicunt nonnulli: maxime diuersa esse illa organa, ita vt sub vno conceptu sexus non stare queant. His vero respondemus: eandem varietatem inter animalia ipsa intercedere. Videamus quaeso quadrupedia, volatilia, aquatilia animalia, ipsaque insecta lustremus; tum in modo coitus, tum in modo exclusionis foetus, tantam habebimus organorum differentiam: interim in omnibus sexum concedimus. Quadrupedia et quaedam volatilia membrum virile in vaginam foeminae immittunt: in quibusdam volatilibus tantum ad osculationem obseruatur: in piscibus sufficit eiectionis vtriusque seminis a). In omnibus his, vel connexionem organorum, vel dimissionem spermatis supra ouula, obseruamus. Prius quidem in nulla planta hactenus obseruare licuit: sed, cur hoc vrgeant contradicentes, non videmus; cum alter modus ex structura floris egregie explicetur.

§. XXXVIII.

*Obiectio de
multitudine
florum hermaphroditorum tollitur.*

Singulare et a sexus idea alienum esse videtur, quod maxima pars florum ad hermaphroditos recensetur; cum in animalibus semper ad duo corpora respiciamus, quae organa generationis seiuncta habent. Sed primo monendum est: nos semper ad usum partium et effectuum analogiam attendere, et ex iis sexum determinare. Postmodum etiam facile probari potest, dari animalia hermaphrodita. P O V P A R T I V S varia de his habet et in primis lumbricorum terrestrium exemplum adducit b). De limace D V V E R N E Y idem

a) De Piscium coitu vid. obseruatio LOEWENHOECKII Phil. Transact. 1699. Mens. Aug. No. 255. p. 270. et BLAIRIVS Bot. Ess. p. 305. Ess. IV.

b) Hist. Ac. Reg. Sc. 1699. p. 47.

idem exposuit a). Licet tamen hic masculina et foeminina organa in eodem corpore inueniantur; tamen in omnibus coniunctio duorum animalium requiritur. Valeat igitur exemplum musculi (moule d'etang) a MERYO adductum b), quod ostendit: musculum, sine concursu alius animalis sibi similis, dum organa masculina et foeminina simul habeat, generationem perficere. Plures forsitan, in hoc negotio, naturae varietates considerandae essent, quae indefessus labor et adcurata observatio detegent.

§. XXXIX.

Quaestio etiam formatur: an differentia partium generationis in planta, fundamentum methodicae dispositionis vegetabilium esse possit? Respondemus adfirmando. Cum enim methodus, ex partium diuersitate et ex signis inde desumptis, formetur; non negamus et has partes aequae diuersas esse. Praestitit hoc maximo cum adplausu Cel. LINNAEVS, in generibus plantarum et aliis scriptis. Cum interim, maxima partium exiguitas et inde pendens cognitionis difficultas, in variis contradicere videantur; reliquae partes, ut in animalium sic et in vegetabilium cognitione, in auxilium duci possint; et lusus naturae in generationis organis tam solemnes sint, quam in aliis: non certo constat, an illa dispositio plantarum aliis methodis sit praeferenda. Hoc interim nullus vegetabilium scrutator negabit: cognitionem partium illarum, non raro dubia plantarum genera, melius quam alias plantae partes determinare posse c). Et cum ipse auctor agnoscat, sexualem methodum non esse veram naturalem, ad illam tamen proxime adcedere libenter profiteamur.

NOBI-

a) Ibidem 1708. p. 58. Conf. etiam MART. LISTERI exercitatio anatomica de Cochlea. p. 113. Edit. Lond. 1694. 8. mai. et in exercitatione anatomica altera, passim edit. ibid. 1695. 8. mai.

b) Hist. Ac. Reg. Sc. 1710. Hist. p. 39. et 41. it. Mem. p. 533.

c) Hist. Acad. Reg. Sc. 1711. Mem. p. 276. GEOFFROI disquisitionem staminum in characteribus plantarum commendat.

NOBILISSIMO ET DOCTISSIMO
DOMINO RESPONDENTI

S. P. D.

P R A E S E S.



Egetabilium studium medico maxime necessarium esse, illi iudicant, qui, rationalem medicinam exercentes, cognitionem simplicium curae cordique habent. Loquuntur illud et veterum et recentiorum testimonia, resque ipsa demonstrat: medicum eorum gnarum esse debere, quorum ope in corpus aegrotum agit. Sed et alia sunt, quae huius studii utilitatem in arte salutari commendant. Partium corporis humani

humani fabrica et usus, post multos labores et intensam meditationem, demum patent. Non inanes igitur eorum sunt conatus, qui, inter alia huius studii adminicula, animalis atque vegetabilis comparatione utuntur et ita generalem corporum oeconomiam ex principiis physicis deducunt. Hac via incedentes phantasmata relinquunt et eiusmodi principiis innituntur, quae curam sanitatis suscipiendam facilitant. Haec et Tibi, Amice Suavissime, perspecta esse atque probata, ex fervore adparet, quo in vegetabilia flagras. Non de historica tantum, sed et de physica cognitione, sollicitus es et iis medicam egregie superstruis. Praeter multa studii specimina, quae et amicis et mihi praesertim exhibuisti, publicum hocce testimonium edis, dum veritatem, multorum contradictionibus obnoxiam, allacriter defendendam suscipis. Opus illud,

stimulum, qui Te ad intima medicinae indaganda inpellit, eximie prodit. His etiam inposterum insiste vestigiis, et dum, Patronorum spem, Parentum vota, amicorum gaudia, maximo adplausu inples; amicitiam simul auge qua me haecenus amplexus es. Ego nihil magis in votis habeo, quam ut de praemiis, laboribus Tuis dicatis, Tibi proxime congratulari queam. Vale et me ut soles ama. Kalend. Nouembris. M DCC XXXVII.

